

Esperanto en Belgio 2025 - jarraporto



© bildo: Internacia Esperanto-Instituto

esperanto
Belgio

Enhavo

Enkonduko.....	3
La agado de esperantistoj en Belgio en 2025.....	3
Januaro.....	3
Februaro.....	7
Marto.....	9
Aprilo.....	10
Majo.....	12
Junio.....	15
Julio.....	18
Aŭgusto.....	20
Septembro.....	23
Oktobro.....	25
Novembro.....	27
Decembro.....	32
Belga Esperanto-Federacio kaj UEA.....	34
La estraro de BEF.....	34
Komitatanoj de UEA.....	35
Delegitoj de UEA.....	35
Belgaj asocioj kaj lokaj grupoj.....	36
Flandrio: Flandra Esperanto-Ligo (FEL).....	36
La estraro de FEL.....	37
Lokaj grupoj de FEL.....	38
Bruselo: Esperantista Bruselo Grupo (EBG).....	39
Valona Esperanto-asocio (V.Esp-o).....	40
La estraro de V.Esp-o.....	41
Lokaj grupoj de V.Esp-o.....	41
Asocioj aktivaj en Belgio.....	42
Movado sen Nomo.....	42
Verdaj Skoltoj: niaj junuloj.....	43
Eldonejo Libera.....	44
BAFE - fervojistoj.....	44
BEMI - biciklistoj.....	45
ILEI - instruistoj.....	45
IESPA - arkivo.....	45
Publike alirebla Esperanto-dokumentaro en Antverpeno.....	48
Esperanto-Numismatika Asocio (ENA).....	49
TEVA - vegetaranoj.....	50
Konkludo.....	51

Enkonduko

La estraro de Belga Esperanto-Federacio volas per jarraporto doni superrigardon de la ĉefaj Esperanto-agadoj en Belgio. Belgaj esperantistoj estas aktivaj, sed la aktivuloj en la diversaj regionoj de nia lando ne ĉiam scias unu de la aliaj pri la planoj kaj realigoj de kluboj kaj unuopuloj. Ĉi tiu raporto celas konigi la agadon de esperantistoj en Belgio, ankaŭ al interesitoj ekster nia lando, kiel la estraroj de Universala Esperanto-Asocio (UEA) kaj asocioj en najbaraj landoj. Kvankam la raporto ne estas kompleta (nek celas esti), ĝi donas tamen ideon de la kvanto kaj diverseco de nia agado.

Ĉi tiu jarraporto estas publika. Verkis ĝin Yves Nevelsteen.

La agado de esperantistoj en Belgio en 2025

Jen monata superrigardo de eventoj kiuj okazis en Belgio en 2025. Informoj estas ĉerpitaj de interalie Eventa Servo, de belgaj Esperanto-revuoj kaj de la Beneluksa Bitarkivo.

Januaro

Novjaraj renkontiĝoj

Tradicie, belgaj esperantistoj kune festas novjaron dum renkontiĝo en Germanio. Familioj iris al **Novjara Renkontiĝo** (NR) de la asocio EsperantoLand en Wiesbaden <http://esperanto.land/nr/>. **Luminesk'**, alia novjara renkontiĝo, okazis en Bielefeld. www.luminesk.de



Pluraj junuloj ĉi-jare iris al **Junulara Esperanto-semajno** (JES) en Ferrières – en Belgio!



La Junulara E-Semajno (JES) estas novjara junulara Esperanto-aranĝo kutime organizata de Pola Esperanto Junularo (PEJ) kaj Germana Esperanto-Junularo (GEJ). Ĝi okazas ĉiujare dum lastaj tagoj de decembro kaj unuaj tagoj de januaro, proksimume dum unu semajno, en iu loko en Meza Eŭropo. Laŭ formo, sed ne laŭ sezono, ĝi similas do al Internacia Junulara Kongreso. De la 27-a de decembro 2024 ĝis la 2-a de januaro 2025 okazis la 15-a Junulara E-Semajno (JES). **Ĝi unuafoje okazis en Belgio.** Organizis JES la Verdaj Skoltoj. Ĉeestis 150 partoprenantoj. Eksciu pli pri JES en la arkiva paĝo <https://benelukso.eu/jes-24-25/>

Studentfolkloro kantuso de KLUBO 01/01

Raportas Delfeno:

En la 1-a de januaro 2025 okazis la unua studentfolkloro kantuso de KLUBO (Klubo de Liberaj Universitatoj de Bruselo). Plano delonge prirevita de nia fondinta membro Kresko – kiu ja ankaŭ ekster Esperantujo delonge kaj fame aktivas en diversaj folkloraj Bruselaj komunumetoj, inter kiuj kantusoj en ULB kaj VUB kaj studentkantverkaj konkursoj – finfine realiĝis unu horon post Novjara meznokto (do sendube estis la unua Esperanto-programero en tuta Belgio en 2025!). Partoprenis dudeko da interesatoj el diversaj landoj: invititaj rekte el apuda salono en la lernejo Saint-Roch en Ferrières, kie estis okazanta la 15-a JES tiumomente.



Post tiu internacia unua provo en Valonio, ni kunvenadis en Bruselo 7 pliajn fojojn, regule en salono disponigita de la trinkejo Dolle Mol, sed ankaŭ foje en salono "Esperanto" de la Foyer Catholique Européen kaj en aliaj trinkejoj. Ni kunvenadis en malgranda grupo 4-ope ĝis 8-ope: foje inter nur KLUBanoj, foje kun invititaj amikoj – ĉu esperantistaj (kiel membro de EBG) ĉu ne-esperantistaj (eĉ vizitantoj el Nederlando, venintaj por kolekti materialojn por podkasto pri Esperanto).

Tiuj kunvenoj (mezume ĉiun 1,5 monatojn) stimulis nin disvolvi nian Esperantlingvan formaton de studentkantuso, bazita je miksitaj kutimoj en tradiciaj studentcirkloj nederlandlingvaj de VUB kaj franclingvaj de ULB. Ĉiam estas ankaŭ spaco por kantado en aliaj lingvoj. Kiam tre plaĉas al ni iu malkovrita aŭ preferata kanzono, ni tradukas ĝin al Esperanto kaj aldonas al nia propra KLUBO-kantaro.

Fine evidentiĝis ke nia propra stilo kaj kantaro sufiĉe maturiĝis por okazigi nian plej grandan KLUBO-kantuson iam ajn, kaj unuan fojon ekster Belgio. Ĝi estis tre konvinka kaj interesega por ni – la kantusestroj – kaj tute nova sperto por plej multaj ĉeestintoj, kiuj ne konis ĉi tiun folkloran tradicion eĉ en siaj naciaj lingvoj. Tamen tio estas rakonto jam por 2026...

Esperanto 3000 40-jariĝis! 15/01

En 2025 la loka klubo de Lovenjo, Esperanto 3000, festis sian 40-jariĝon. Ĝi reale ekzistas jam pli longe; ĝi estis fondita en 1979 kiel fakta societo.

Ĉiu, kiu iam aktive partoprenis en Esperanto 2000 / 3000, estis kore bonvena al la novjarfesto de la lovena Esperanto-grupo. Lode pretigis fotoprezenton, kaj ni rakontis anekdotojn. Marc kunportis fotoalbumojn de la komencaj jaroj. Ĉeestis du aktivuloj de tiu komenca periodo kiuj delonge ne plu aperis en la movado; espereble la festo instigis ilin denove okupiĝi pri Esperanto.



Lode, Yves kaj Jenny pretigis pastaĵojn. Nicky kunportis multajn frandaĵojn. Ni estis 12-ope kaj regis tre bona etoso! Tion atestas la fotoj de la komuna fotaro.

<https://benelukso.eu/eo3000-15jan25/>

Festo okaze de la 45-jariĝo de Movado sen Nomo 26/01

En januaro 2025, estis 45 jaroj post kiam patro Phil Bosmans helpis fondi la asocion Movado sen Nomo, la Esperantan version de sia ĉefa projekto Bond Zonder Naam. Per Esperanto, lia mesaĝo povis disvastiĝi en la tuta mondo. <https://mallonge.net/msn>

Ĝis hodiaŭ, 12 jarojn post lia forpaso en la aĝo de 90, grupo da entuziasmoj vivtenas liajn ideojn. Por plifortigi ĉi tiun celebron, oni invitis ĉiujn “samideanojn” al komuna manĝo. Estis tre sukcesa festo kun amuza skeĉo, kiun Lode, Nicky kaj Piet ripetis dum la BEST-studsemajnfino.



Februaro

Prezento de aŭtobiografio de Jo Haazen 03/02

Ne ofte okazas, ke esperantisto verkas kaj publikigas aŭtobiografion. Des pli ne en la formo de ampleksa trilogia verko. Sed en la kazo de Jo Haazen, pli ol okdekjara, kiu ankoraŭ ne emeritiĝis, tio mirigas neniun. Pri la verko mem ne necesas diri ion: ĝi estas tie por la leganto. Sed ni ne povas silenti, ke malmultaj kapablas tiel bone rakonte verki, kaj ke malmultaj travivis tiom da nekutimaj situacioj en tiom da landoj kiel profesoro Jo Haazen.

La aŭtoro prezentis la verkon la 3-an de februaro 2025 en la fama Nottebohm-salono de la Heredaĵbiblioteko Hendrik Conscience antaŭ multnombra publiko. Kiel per la plumo, tiel ankaŭ per la lango Jo Haazen estas alloga rakontanto. Ke Esperanto regule aperis en la paroladoj, tion oni ne bezonas klarigi. La ĉefe nur nederlandlingvaj aŭskultantoj tiel povis ekscii, ke Esperanto... ankoraŭ ekzistas, kaj estas praktikata... en la tuta mondo.



La aŭtobiografio estas bele eldonita kun unika fotomaterialo. La verko do estas sufiĉe multekosta. Por tiuj, kiuj devas atenti pri siaj elspezoj: eblas ĝin senpage legi en la Heredaĵbiblioteko...

Ben Indestege en Het Belang van Limburg 10/02

Aperis en Het Belang van Limburg artikolo pri Ben Indestege. Li edziĝis kun la afrika esperantistino Miriam Alliance Ingabire en Goma!

En la artikolo Ben rakontas, ke ili interkonatiĝis dum la Universala Kongreso en Aruŝa (Tanzanio) en la somero de 2024.



Lingva kafejo Mondial 11/02

En februaro partoprenis esperantistoj en paroliga rondo Lingva kafejo Mondial en Gento. Ĝi regule okazas. Serĉu en Eventa Servo per <https://mallonge.net/mundial> por novaj datoj.



Belga Esperanto-Studsemajnfino 2025 (BEST)

De la 21-a ĝis la 23-a de februaro en Ipro (Belgio) okazis por la unua fojo BEST – Belga Esperanto-Studsemajnfino. Delonge tia kurso ne okazis en Belgio, do ni tre ĝojas pro la iniciato. Ĉeforganizis la semajnfino Piet Glorieux kun granda helpo de interalie An Olijslagers, Kristin Tytgat kaj Nicky Janssen.

Alex Humet helpis al la komencintoj meti siajn unuajn paŝojn en Esperanto. Pawel Fischer-Kotowski per sia kurso celis tiujn kiuj jam iel elturniĝas en Esperanto, sed volas pliriĉigi sian konon kaj ekzerci sian parolkapablon. Lode Van de Velde helpis siajn kursanojn perfektigi sian lingvouzon en tri ŝtupoj: 1) trovi, korekti kaj kompreni erarojn en tekstetoj; 2) traduki poezion, kaj 3) mem verki, pere de instigiloj, poezion kaj/aŭ mallongajn rakontojn.



Raporton pri BEST publikigis la nederlanda revuo Fenikso (Jarkolekto 30 - n-ro 2 marto - aprilo 2025). Vi povas libere elŝuti ĝin de la paĝo <https://mallonge.net/fenikso-arkivo>. Vidu ankaŭ <https://benelukso.eu/best2025>.



Marto

Ekspozicio 'Rezisti al la milita propagando'

De la 15-a de marto ĝis la 29-a de marto Liège Esperanto kunlaborante kun 3 aliaj neprofitcelaj asocioj venigis la ekspozicion "Rezisti al la milita propagando" kaj invitis s-inon Morelli prelegi en publika kinejo "Le Sauvenièr". Ili ankaŭ organizis gvidatan viziton por esperantistoj sabaton la 22-an de marto. Poste la ekspozicio estis prezentita en Verviers en la "Centre Culturel Duesberg" kaj en Huy en la Ateneo kie ĝi estis uzata de la profesoroj pri historio kaj ĉiuj klasoj vizitis ĝin. Ĉiuj vizitantoj vidis la panelon kun la 10 elementaj principoj de militpropagando kiu ekzistas en Esperanto.



Vizito al Lovenarenbroek (Loven) 30/3

Esperanto 3000 organizis printempan promenon en la naturparko Lovenarenbroek kun vizito al la naturcentro. Post vizito al la Ekologia Centro en Kessel-Lo, okazis gvidata promeno. Lode pretigis tekston en Esperanto pri la naturparko. Vi povas elŝuti ĝin de la arkiva paĝo <https://benelukso.eu/2025-03-30-vizito-al-lovenarenbroek-loveno/>. Tie vi trovos ankaŭ plurajn fotojn de la amuza kaj instrua tago.



Aprilo

Studosemajnfino en Nederlando 4-6/04

Dufoje jare Esperanto Nederland organizas studosemajnfinojn. Tie oni instruas en diversaj niveloj, ekde komencantoj ĝis progresintoj, do vi ĉiuokaze estas bonvena. La fokuso estas ekzercado pri parolado en Esperanto en malgrandaj grupoj.

La studosemajnfino estas tre taŭga enkonduko al Esperanto. Oni tie ne nur konatiĝas kun la lingvo, sed ankaŭ kun la tipa etoso de Esperanto-renkontiĝo. Regule partoprenas belgoj, ĉu por lerni, ĉu por instrui Esperanton. **Piet Glorieux** kaj **Yves Nevelsteen** instruis tie en aprilo. Dum paŭzoj Yves organizis etan libroservon.

Ĉu vi mem volas foje partopreni en studosemajnfino? En la retejo de Esperanto Nederland <http://mallonge.net/sts> vi trovos informojn, aliĝilon, fotojn, artikolojn kaj eĉ filmetojn.



Tago de la Flandraj Ardenoj 27/04

Ĉiujare la flandra naturasocio Natuurpunt organizas Tagon de la Flandraj Ardenoj. Dum tiu tago la lokaj naturasocioj montras siajn Flandrajn Ardenojn en printempaj vestaĵoj. Estas jam longa tradicio, ke ankaŭ esperantistoj partoprenas. En aprilo 2025 la evento okazis en Maarkedal; **la Esperantoparton organizis Piet Glorieux** nome de la loka grupo La Konkordo. Piet, kiu estas ankaŭ la prezidanto de FEL, verkis ĉi tion en Eventa Servo pri la evento:

Dum la tagmezo ni manĝis nian piknikon en Louise-Marie, kie ĉiuj partoprenantoj kunvenis. Danke al Tabatha, kiu venis el Bruselo, kaj al Katja kaj Hans el Gento, ni povis denove stari ĉe informa tablo. Ĉiam rimarkigas, ke homoj, kiuj interesiĝas pri la naturo, ankaŭ emas esti malfermaj al "novigaj" ideoj kiel Esperanto. Eble tio rilatas al la fakto, ke tio estas unu el la maloftaj okazoj, kiam ne-esperantistoj aŭdas Esperanton "en ago". Ŝajnas al mi bona strategio kunlabori kun samideaj organizoj, eĉ nur por montri, ke Esperanto ekzistas.

<https://eventaservo.org/e/fa25>

Limburga Tago 27/04

Ĉi-foje Limburga Esperanto Asocio (LEA) invitis nin en la bela regiono *Fruitstreek* (frukta regiono). La Limburga Tago okazis kunlabore kun loka asocio kiu aktivas por evoluigi vilaĝojn en Afriko. Respondeculo tre profesie kaj interese prelegis kun bildoj pri ĝia labormaniero kaj pri la rezultoj. La limburga grupo prizorgis abundan tagmanĝon, kiu donis fortojn al la +/-25 partoprenantoj, kiuj poste aŭ promenis, aŭ biciklis en la bela regiono.



Majo

Trinkeblaj riveroj 07 kaj 14/5

En majo okazis du promenadoj kunlabore kun la asocio *Drinkable Rivers*. Unua promeno okazis la 7-an de majo, laŭ la Skeldo de Gento ĝis Melle. <https://eventaservo.org/e/432d5a>

Esperantistoj kunvenis en Kruibeke la 14-an de majo. Grupo vizitis post la promeno la akvofalon ĉe la kontrolita inundejo en Kruibeke. <https://eventaservo.org/e/c23e4d>



PEKO 16-18/05

Ekde 2011, PEKO estas LA Esperanto-renkontiĝo en Belgio: internacia dank' al la partoprenado de multaj flandroj, valonoj, bruselanoj kaj eksterlandanoj, profesie organizita, malfermita al ĉiuj, kaj kun bonegaj manĝaĵoj.




Post 10 jaroj da organizado de eventoj, la skoltoj iĝis sperteguloj, kaj ĉi-jare ili denove montris tion. Kun aktivaĵoj kiel kvizoj, prezentaĵoj kaj prelegoj pri kafo?! Sabattagmeze estis du eblecoj: por la etuloj urboludo, kaj por la resto ekskurso al Blegny Mine. Tio estas (estis) grandega minejo kie ĝis 1980 oni minis por karbo. La ĉiĉerono antaŭ multaj jaroj eĉ mem estis parto de tiu grupo de ministoj! Li montris la danĝerojn kaj la ilojn de la minejo. Kiam ĉiuj revenis, ili ĝuis bonegan koncerto de Mezbakita (Briardo kaj Magoto). Kompreneble nur post la vespermanĝo kuirita de Lupo. Dimanĉe ĉiuj bedaŭrinde jam devis foriri, sed nur post partopreni al muzika kvizo kaj manĝi lastan tagmanĝon.



Fantazia foiro 24/05

De januaro al junio, ĉiulunde posttagmeze, Eric donis kurson por 12-jaraĝaj infanoj. Li uzis la metodon Multlingva Akcelilo. La komenco de la kurso okazis en septembro, kaj 30 infanoj partoprenis la fulmokurson. Pro diversaj kialoj nur 5 infanoj komencis, sed nur 2 knabinoj partoprenis ĝis la fino kaj 1 plenkreskulino kiu venis de Lieĝo por sekvi la kurson.

Bedaŭrinde, kiam ni volis rekomenci novan kurson en septembro 2025, estis nur 2 kandidatoj kaj tio ne sufiĉas por komenci novan kurson.



La 24-an de majo Eric Nemes kun siaj lernantinoj animis budon dum la “fantazia foiro” de la lernejo. Dudeko da infanoj malkovris la bazojn de la lingvo ludante kun la elektra panelo.



Junio

Libro pri la familio Witteryck en Bruĝo 3/6

Marde la 3-an de junio la libro '*Tri generacioj Witteryck en Bruĝo*' estis solene prezentita okaze de la disdono de la jara Premio Stichting-Witteryck. La libro enhavas vastan ĉapitron pri Esperanto (30 paĝoj). Ĝi rakontas, kiel A.J. Witteryck komence estis subtenanto de Volapük, sed rapide transiris al Esperanto. Li estis amiko de komandanto Charles Lemaire, kiu enkondukis Esperanton en Belgion, kaj li fondis la unuan brugan esperantogrupon.




Dum la solena prezento de la libro en la belega gotika salono de la urbodomo de Bruĝo, Esperanto ankaŭ ricevis atenton. Roland Rotsaert havis la eblecon prezenti Esperanton en intervjuo pri la libro kune kun la aŭtoro.

Roland ne preterlasis la okazon atentigi la multnombren ĉeestintan publikon ankaŭ pri la hodiaŭa Esperanto.

Loka gazeto raportis pri la evento:

<https://mallonge.net/brugho25>



Stadskronieken 06/06 (aprobo 26/06)

Stadskronieken estas serio de libroj kiuj pritraktas la nemateriajn kulturajn heredaĵojn de Antverpeno kaj ĝiaj distriktoj. La libroj povas temi pri iu kvartalo kun interesaj (historiaj) raportindaĵoj, ekz. pri aŭtentika kafejo, junulara movado aŭ sportklubo. Ili kolektas fotojn, historiajn dokumentojn, faras intervjuojn kaj tio rezultas en profesia libro, kun la subteno de ErfgoedLab Antwerpen, kiu eĉ donacas 300 ekzemplerojn de la libro al la asocio.



Laborkunsido en Deurne: Ivo, Klaas, Paul kaj Lode. Fotis: Agnes

Lode Van de Velde, la FEL-dungito, en junio unuafoje kunsidis kun reprezentanto de Stadskronieken. Intertempe la kunlaboro ekis. Lode kunigis kelkajn antverpenajn veteranojn kiel i.a. Agnes Geelen, André Staes, Ivo Durwael, Klaas Dijkstra kaj Paul Peeraerts, kiuj bone konas la historion de la movado en Antverpeno. La teamo verkas *Stadskroniek*, urban kronikon pri Esperanto en Antverpeno, kunlabore kun la urbo Antverpeno, kaj reiras en la tempon ĝis la pionira periodo. La libro estos tutkolora kaj ampleksos 130 paĝojn. Oni strebas al publikigo de la libro en 2027, tiam la antverpena grupo (fondita en 1907) ekzistos ekzakte 120 jarojn, do oni povos ligi la aperon de la libro al jubilea evento okazonta.



<https://www.erfgoedlabantwerpen.be/verhaal/alles-over-stadskronieken>

Tuttaga kultura ekskurso en Gent 15/06

Ĉiujara ekskurso, kiu celas ankaŭ amikojn kaj simpatiantojn, kiuj (ankoraŭ) ne parolas Esperanton. Ni kune vizitis foto-ekspozicion en la Abatejo Sankta Petro (Sint Pietersabdij), faris gvidatan promenadon tra la malnovaj dokoĵoj en la haveno de Gento kaj finis la tagon en la trinkejo "De Viking", kie laboras la plej maljuna kafejposedantino de Gent.

<https://eventaservo.org/e/4cdf67>



Ekskurso de La Erikejo 19/6

Jara ekskurso de la nordkampina grupo La Erikejo al promenloko trans la belga landlimo, ĉi-foje al la Markiezenhof in Bergen op Zoom. En la foto aperas Simon Smits, 91-jara kaj unu el plej fidelaj membroj, kune kun sia akompanantino Ineke. Unu monaton poste li trankvile forpasis hejme en sia lito. <https://eventaservo.org/e/fa9afc>



Festo en Ostendo 21/06

La loka grupo La Konko feste finis la laborjaron per tagmanĝo en "De Kleine Garnaal" en Ostendo. Oni honorigis la multjarajn membrojn Flory Witdoeckt kaj Germain Pirlot pro ĉio, kion ili signifis por La Konko kaj por Esperanto ĝenerale. Flory kaj Germain estas gravaj kaj famaj esperantistoj; vi povas legi pri ili en Vikipedio:

- https://eo.wikipedia.org/wiki/Germain_Pirlot
- https://eo.wikipedia.org/wiki/Flory_Witdoeckt



La urbestro de Ostendo kaj la skabeno pri kulturo ĉeestis la honorigon!

La Konko malfermis apartan konton por donaco por Flory por ŝia Florado NV, per kiu ŝi helpas esperantistojn en Kongo, kaj Germain, kiu nun loĝas en WZC, estas dankata per fruktokorbo. **Belga Esperanto-Federacio donacis 100 eŭrojn.**

Julio

Kurso en Namur 4/7

Jean Annet komencis novan kurson por komencantoj ĉe l'Université Tous Âges de Namur. Li uzas la kurslibron *Espéranto par la méthode directe* de Stano Marček. (<https://mallonge.net/kurslibro24>). La kurso estas sukcesa; ĝi okazas ĉiusemajne kaj regule ĉeestis 9 lernantoj. Pliaj informoj en la retejo de UTAN: <https://mallonge.net/utan-eo>

En julio okazis komuna manĝo, por fini la lernejan jaron. La kurso rekomenciĝis en septembro; eĉ ekzistas du grupoj.



Kunveno de la Huy-a Esperanto-grupo 26/07

La Huy-a Esperanto-grupo festis la 26-an de julio 2025 en Moresnet, precipe ĉe la "Punkto de la Tri Landoj" .

Tri kialoj festi ĝin specife kaj precize tie:

1. La 138-a datreveno de la publikigo de la Unua Libro
2. La 120-a datreveno de la Kongreso, kiu adoptis la flagon, la kantotekston de la himno kaj la deklaron pri nereligia universaleco de Esperanto
3. La 105-a datreveno de la integriĝo de Amikejo al Belgio, kie ni devus plu antaŭenigi universalajn humanismajn valorojn, tiel bone akordigitajn kun la Celoj de Daŭripova Evoluigo kaj nia deziro al daŭra paco.



Karima Tafrata, Delphine Vanseveren kaj Philippe Draize de la grupo de Huy.

Aŭgusto

Universala Kongreso en Brno 26/07-02/08

La Universala Kongreso de Esperanto (UK) estas "internacia manifestacio de la esperantistaro", organizata de UEA. Ĝi estas kulturfesto, tutmovada forumo, turisma festo kaj laborkunveno de la organoj de UEA kaj de aliaj Esperanto-organizaĵoj.

La gastiga urbo de 2025 estis Brno: kun ĉ. 400 000 loĝantoj, ĝi estas la dua plej granda urbo de Ĉeĥio, en la sudorienta parto de la lando.

Pluraj belgaj esperantistoj iris al la kongreso. Jen foto de kelkaj el ili tuj post la solena inaŭguro:



Piet Glorieux invitis al komuna manĝo de belgoj. Jen foto-impreso de tio:



Post la UK, Vilhelmo el Kubo vojaĝis tra Eŭropo dum tri monatoj per Pasporta Servo. Li iris al Prago, Dresden, Parizo kaj al Belgio, kie li restadis ĉe interalie Marie apud la maro kaj en Antverpeno, ĉe Eddy kaj Ella.



Tendumado de la Verdaj Skoltoj 1-10/08

En aŭgusto 2025 okazis tendumado en la Esperanto-urbo Herzberg, kunlabore kun la urbo. Partoprenis 33 skoltoj (10 plenkreskuloj, 15 esploristoj, 8 lupidoj) el 9 landoj (Belgio, Ĉeĥio, Francio, Germanio, Hungario, Pollando, Skotlando, Svislando kaj Ukrainio).

Por la unua fojo oni kreis ŝtofinsignon por la partoprenantoj. Vidu la rezulton ĉi-apude!

La venontjara tendumado okazos en Ĉeĥio kunlabore kun la organizantoj de la Renkontiĝo de Esperanto-Familioj (REF).

Etaj raportoj kaj fotoj aperas en la Facebook-paĝo de la Verdaj Skoltoj

<https://www.facebook.com/verdajskoltoj>. Bonan ideon de la agado donas la filmeto 'Aventuraj kunvenoj'; vidu <https://mallonge.net/aventuraj>



Septembro

Partopreno en la foiro Retrouvaille 06-07/09

La 6-an kaj 7-an de septembro la lieĝa grupo organizis budon dum la « foiro » Retrouvaille kaj disdonis faldfoliojn por inviti al Schleiden kaj Moresnet. Eric estis intervjuita de la radio RCF. Vidu <https://mallonge.net/r25>. La intervjuo pri Esperanto komenciĝas je la minuto 120' kaj daŭras + - 50'.

Inaŭguro de monumento por la paco

La 19-a de septembro *Espéranto Liège* partoprenis kun aliaj neprofitcelaj asocioj al la inaŭguro de monumento por la paco, kaj metis florkronon sub la monumenton kun packolombo.

La ceremonio estis organizata de la urbo Lieĝo sekvante demando de la FNC (Nacia Asocio de la Veteranoj).



La Progreso partoprenis en Kultura Foiro en Gent 13/09

Pluraj aktivuloj partoprenis en la genta "Cultuurmarkt" ĉe Kouter. La bazon komenciĝis je la 11h kaj finiĝis je la 17h.

Ĉeestis la kreinto de elektronika varba panelo, Arie Bouman. Li rakontis, ke li siatempe kreis 35 tiajn panelojn! Ili dissendiĝis al la tuta mondo; malmultaj homoj scias pri tio. Temas pri tre efika ilo, kiu dum la foiro konkrete vekis la interesiĝon de pluraj personoj.



FEL varbis dum foiro por volontuloj 21/09

Dimanĉe, la 21-an de septembro, la Flandra Esperanto-Ligo ĉeestis la jaran voluntulmerkaton, kiu ĉi-foje okazis en kaj ĉirkaŭ la Zuiderpershuis en Antverpeno. La oficisto Lode Van de Velde kaj prezidanto Piet Glorieux prizorgis la budon de FEL.



Flandra Esperanto-Ligo ja povus uzi iom da pliaj volontuloj. Sed ankaŭ estis bona okazo iom interrilati kun samideaj organizoj kaj fariĝi “videbla” al la publiko.

La ĉeesto estis interesa pro du kialoj: la “pli aĝaj” homoj malkovris, ke Esperanto “ankoraŭ” ekzistas kaj ricevis pli ĝustan bildon pri ĝi; junuloj aŭdis pri Esperanto por la unua fojo, kaj ofte trovis ĝin fascina ideo.

Kvankam ni ne tuj trovis kandidatojn por niaj sufiĉe specifaj profiloj – volontulo ja devas havi certan afinecon kun la ideo de Esperanto – ĝi tamen estis agrabla sperto, kaj la partopreno certe valoras ripeton. (Fonto: Horizontaal septembro 2025)

Dimanĉe dumtage 28/09

Proksimume unufoje monate en 2025 la loka grupo de Antverpeno, la Verda Stelo, organizas dimanĉajn ĉeestajn kunvenojn. Ofte oni kune manĝas supon. La ĉefa celo estas paroligi homojn.

Dum la dimanĉa dumtaga ĉeesta kunveno en septembro vizitis Antverpenon Aleksej Salomatov el Rusio, kiu prizorgis programon kun dokumenta filmo kiun li mem faris.



Oktobro

Gebeneluksa Kongreso 2-5/10

La Beneluksa Kongreso estas ĉiujara belga kongreso organizita de flandraj aŭ valonaj esperantistoj. En 2024 ĝi okazis en Hasselt. En 2025 Valona Esperanto-Asocio (V.Esp-o) kaj Germana Esperanto-Asocio (GEA) kunlaboris por okazigi Gebeneluksan Kongreson. Komuna Germana kaj Beneluksa Kongreso okazis de la 2-a ĝis la 5-a de oktobro 2025 en Schleiden-Gemünd/Germanio.



Gebeneluksa Kongreso

Kun ĉ. 150 partoprenintoj, la kongreso estis tre sukcesa. En la kongresa retejo <https://benelukso.eu/gebk2025> vi trovos la programon, liston de partoprenintoj kaj vi povas elŝuti la kongreslibron.



Jen kelkaj organizantoj de la kongreso:



Por revivi la belajn momentojn, rigardu nian komunan fotaron ĉe:

👉 mallonge.net/fotaro-GEBNLK2025

Jen komuna foto kiun faris Martin Haase:



Kelkaj homoj filmis, kiel Aleksej Salomatov, kiu kreis 5-minutan filmeton de la ekskurso al Moresnet. Vidu <https://mallonge.net/amikejo-filmeto>

Radio-elsendo 27/10

Okazis unuhora radio-elsendo (en la franca) ĉe Radio Panik pri Esperanto kaj iom en Esperanto kun du esperantistoj kiuj tre bone regas la lingvon.

Ĉe Flux Detendu, oni parolis kun Bernard-Régis Larue, la prezidanto de Esperantista Brusela Grupo, kaj kun Dafydd Ab Iago, kimra ĵurnalisto, kiu estis “Esperantisto de la jaro” en 2002.

Oni parolis pri kelkaj kulturaj referencoj de Esperanto, la historio de la lingvo, la klubo de Bernard-Régis Larue, la Esperantaj aktivaĵoj de Dafydd Ab Iago, kiel ili uzas la lingvon, kaj oni havis mallongan improvizitan lecionon pri gramatiko kaj prononco.


Vi povas aŭskulti la elsendon per jena ligilo:

www.radiopanik.org/emissions/flux-detendu/flux-detendu-esperanto/

Novembro

Namur-a Universitata Radio 5/11

Jean Annet prezentas programon pri Esperanto ĉiun unuan merkredon de la monato en Radio Universitaire Namuroise (RUN). La 5-an de novembro li parolis pri **“La interna ideo”**. Oni devas serĉi la 30-an minuton, kaj tio daŭras duonhoron. Prezento de la radio: <https://mallonge.net/run>.



Prelego de Tabatha Fabri ĉe ULB 13/11

La Centro pri Historio kaj Sociologio de la Maldekstro organizis seminarion la 13-an de novembro 2025: “Esperanto, komuna lingvo por la maldekstro de morgaŭ?” kun Tabatha Fabri. Kristin Tytgat enkondukis la seminarion kun ĝenerala prezentado de Esperanto kaj esploroj en universitatoj. La temo de la enkonduko estis "Esperanto en universitata medio".

La konferenco konsistis el historia panoramo dividita en tri periodoj:

- La anarkiista esperantista periodo (1904–1908), reprezentata de la brusela komunumo L'Expérience.
- La tutmonda sennacieca asocio SAT (ekde 1921) kaj la korespondado, kiun ĝi organizas kun la tuta mondo, inkluzive de interŝanĝoj inter Bruselo kaj Sovetunio, dum ĝi samtempe esprimas radikalan kaj apartan rifuzon de naciismo.
- Fine, la post-duamondmilita periodo, por kompreni la defiojn de la neŭtraliga turniĝo de movado, kiu provas rekonstrui sin post malpermeso.



L'ESPÉRANTO, UNE LANGUE COMMUNE POUR LA GAUCHE DE DEMAIN ?



Tabatha Fabri

**Doctorante à l'École
des hautes études en
sciences sociales
(EHESS)**

Séminaire le jeudi 13 novembre 2025 à 18h

**ULB, Campus du Solbosch,
bâtiment S, salle Henri Janne,
15^{ème} étage, S.S.15.331**

ENTRÉE LIBRE

Renseignements : <https://chsg.ulb.ac.be/>

Detala raporto aperis en la revuo Esperanto en Marche 2025/4.

Muziktago en Loveno 16/11

Je la 16a de novembro 2025, Esperanto 3000 denove organizis ♪ Muziktagon ♪. Tiuj kiuj volis, povis jam matene kunfari muzikon. Ĉiuj estis invitataj veni kun sia instrumento, aŭ sia voĉo, por kune fari muzikon. Ne gravas via nivelo, ni kunlernos, kunludos kaj kune amuziĝos. Posttagmeze okazis kantocirklo. Organizantoj priskribis tion ĉi tiel en la invito:

Cirkla Kantado

Ĉu vi ŝatus unikan muzikan sperton, kie vi povas esti vi mem? Malkovru Cirklan Kantadon – ludeman kaj konektan manieron kanti kune, inspiritan de la kantisto Bobby McFerrin. Vi ne bezonas antaŭan muzikan scion. Kanta sperto ne estas necesa. Ne-Esperanto-parolantoj estas bonvenaj. Ni ne kantas en specifa lingvo.


Ni formas rondon kune. En la mezo staras faciliganto/dirigento, kiu provizas mallongajn melodiojn kaj ritmajn ŝablonojn (buklojn). Malsamaj grupoj en la rondo kantas ĉiun sian propran buklon, iom post iom kreante polifonian komponaĵon. Per korpoperkutado, soneligado aŭ improvizado, aperas unika muzikaĵo, kiu povas ekzisti nur en tiu momento.



Pliaj fotoj aperas en la Beneluksa Bitarkivo <https://benelukso.eu/bitarkivo/>

Prezento de Esperanto en lernejo en Aalter 27/11

Yves Nevelsteen prezentis por la tria fojo en kvar jaroj en la lernejo Emmaüs en Aalter Esperanton al lernantoj de mezgrada lernejo. La prezento okazis kadre de 'TalenT' (taalbeleving en taalbeheersing). Ili pretigis karteton kun ĉi tiu teksto!



Jarfina agado de Movado sen Nomo 29/11

Movado sen Nomo invitis esperantistojn kaj ne-esperantistojn, infanojn ankaŭ, al la jarfina agado de MsN. Aktivuloj prezentis la novan kalendaron de 2026, kiu estas tute en Esperanto. Poste okazis ateliero pri farado de jarfinaj ornamaĵoj kaj bondezirkartoj. Kaj oni manĝis patkukojn!



Pliaj fotoj aperas en la Beneluxa Bitarkivo <https://benelukso.eu/bitarkivo/>

Decembro

Tutbelga Zamenhoffesto en Antverpeno 13/12

La Zamenhofa Tago (15-a de decembro) estas la naskiĝtago de L. L. Zamenhof (1859-1917), la iniciatinto de Esperanto, kaj la plej vaste celebrata festotago en Esperantujo. En tiu tago (aŭ en alia konvena semajntago ĉirkaŭ ĝi) esperantistoj en la mondo okazigas specialajn renkontiĝojn por festi la okazon. La idearo de Esperanto kaj la proksimeco de la Zamenhofa tago al Kristnasko instigas la kunvenintojn interŝanĝadi donacojn (prefere librojn verkitajn en Esperanto) kaj bondezirojn. Foje okazas dum tiaj kunvenoj ankaŭ prelegoj pri L. L. Zamenhof. Ekde 1927, tiu datreveno estas samtempe la Tago de la Esperanta kulturo kaj la Tago de la Esperanto-libro. [Legi pli en Vikipedio.](#)

De pluraj jaroj, belgaj Esperanto-klubo kaj -asocioj kunlaboras por kune festi tiun tagon. Antaŭe okazis apartaj festoj en diversaj kluboj de la lando, sed Belga Esperanto-Federacio instigas renkontiĝi pli grandnombre kun esperantistoj el tuta Belgio (kaj kun interesitaj eksterlandanoj!).

Ĉi-jare, la antverpena klubo La Verda Stelo organizas la tutbelgan Zamenhoffeston. En bela salono – kie iam ekzercadis la Baledo de Flandrio – oni servis tre bongustan lunĉon (vegetaran, veganan kaj nevegetaran), koncerton de Kajto kaj libroservon. Estis multe da tempo por interbabili. Kunfestis ĉirkaŭ 60 personoj.



Antverpena klubo La Verda Stelo organizas la tutbelgian Zamenhoffeston. Vere lastmomente kaj ekster nia povo ni devis ŝanĝi la ejon, sed ni trovis etosplenan alternativon, eble eĉ pli taŭgan. Kie iam ekzercadis la Baledo de Flandrio, ni regalis vin per bona manĝo, koncerto de Kajto, libroservo kun multe da tempo por interbabili.

En la vespero ni plufestos !!

ZAMENHOFFESTO la 13-an de decembro 2025
buurtcentrum cortina
Kerkstraat 68, Antwerpen | ekde la 10a horo

Kotizo ĝis 23-a de novembro estas € 55 (<12j €27,50), sen manĝo €30; poste +5€.
Aliĝu ĉe esperanto-antwerpen@esperanto.be (nomo(j)), manĝo vianda, vegetara aŭ vegana)
Aliĝo validas post pago al BE60 9792 1479 3670, je nomo de "La Verda Stelo, Antwerpen"

venu VENU por la Belgia festo de 2025 !!



La LKK (Piet, Marie kaj Johan) prezentas la venontjaran Beneluksan Kongreson, kiu okazos en De Haan 24-28 septembro 2026.

Belga Esperanto-Federacio kaj UEA



Universala Esperanto-Asocio

(en oficialaj rilatoj kun UN kaj Unesko)

UEA

UEA nur rekonas landajn asociojn, ne regionajn. Belga Esperanto-Federacio (BEF) estas la Landa Asocio de UEA en Belgio, fondita en 1962. BEF estas ekde 2005 fakta asocio. BEF rolas de tiam kiel **neformala kupolo** de ĉiuj aktivuloj de la Esperanto-movado en Belgio. Pri BEF kaj ĝia historio vi povas legi en Vikipedio: <https://eo.wikipedia.org/wiki/BEF>

La estraro de BEF ekzemple decidas kun la prezidantoj de la membraj asocioj kiu organizos kie la ĉiujaran Beneluksan Kongreson (<https://benelukso.eu/kongreso>) kaj la Zamenhofan feston (<https://benelukso.eu/zamenhof-festo>). Ekde 2025 aldoniĝas al tio la kursesmajnfino BEST (<http://esperanto.be/best>).

En BEF membras jenaj asocioj (stato 2025):

- Flandra Esperanto-Ligo
- Valona Esperanto-asocio
- Esperantista Brusela Grupo
- Verdaj Skoltoj

Aliaj asocioj kaj individuoj kiuj aktivas en Belgio estas

- Internacia Ligo de Esperantistaj Instruistoj (ILEI)
- Eŭropa Esperanto-Unio (EEU)
- Movado sen Nomo (MsN)
- Senlime
- Internacia Esperanto-Arkivo (IEspA)
- Belga Amikaro de Fervojistoj Esperantistaj (BAFE)
- Biciklista Esperantista Movado Internacia (BEMI)
- Tutmonda Esperantista Vegetarana Asocio (TEVA)
- Esperanto-Numismatika Asocio

Cetere ekzistas ankaŭ

- Fonduso Instigo (Eventa Servo, Komputeko ktp.)
- Beneluksa Bitarkivo
- La domo de Mateo

La estraro de BEF

Estraro ekde 2024-10

Prezidanto: Yves Nevelsteen

Sekretario: Jean Annet

Kasisto: Claude Gladly

Estraro 2018 - 2024

Prezidanto: Kristin Tytgat

Vicprezidanto: Flory Witdoeck

Sekretario kaj kasisto: Claude Glady

Estrarano: Yves Nevelsteen

Komitatanoj de UEA

La Komitato estas la supera gvid-organo de UEA. Ĝi havas la rajton fari ĉiujn decidojn pri la direkto de la agado kaj pri unuopaj agadoj. Ĝi ankaŭ rajtas fari ĉiujn decidojn pri administrado, financaj planoj, ktp. La komitato kunsidas ĉiujare dum la Universala Kongreso kaj laboras perpoŝte dum la cetero de la jaro. La komitatanoj havas trijaran oficperiodon. <https://uea.org/asocio/komitato>

Komitatano A de UEA estas membro de komitato de UEA elektita de aliĝinta landa asocio aŭ aliĝinta faka asocio. Aliĝintaj membro-asocioj rajtas elekti unu komitatanon por ĉiu komencanta milo da membroj. Asocioj kun malpli ol 100 membroj rajtas nomumi observanton. Komitatano A por Belgio en 2025 estis **Marc Cuffez**.

Komitatano B reprezentas la individuajn membrojn (IM) de UEA. En 2025 okazis elekto de novaj gvidorganoj de UEA por la periodo 2025–2028. Parto de ĝi estos la elekto de komitatanoj B por reprezenti la individuajn membrojn en la Komitato de UEA. Laŭ la Statuto oni elektas unu komitatanon B por ĉiu komencita milo da IM. Laŭ la antaŭvidata nombro de IM oni elektos kvin komitatanojn B.

Komitatano C de UEA estas membro de komitato de UEA elektita de komitatanoj A kaj B. Komitatanoj C estas personoj, kiuj estas elektitaj al la komitato pro siaj aparte bezonataj spertoj. Ofte komitatanoj C estas elektitaj estraranoj de UEA. Komitatanoj C povas esti maksimume 25 % el la kvanto de komitatanoj A kaj B. Du belgoj estis Komitatano C en 2025: **Eric Nemes** kaj **Rakoen Maertens**.

Delegitoj de UEA

Delegito de UEA estas reprezentanto de Universala Esperanto-Asocio. Ŝi aŭ li plenumas la servopetojn de la membroj. Listo de belgaj delegitoj aperas en <https://uea.org/reto/delegitoj/belgio>. Ĉefdelegito por Belgio en 2025 estis **Claude Glady**.

Belgaj asocioj kaj lokaj grupoj

Flandrio: Flandra Esperanto-Ligo (FEL)

Flandra Esperanto-Ligo estas la kupola Esperanto-asocio de Flandrio. Ĝia konata eldonejo interalie eldonas la **tutmondan magazinon Monato** (<https://monato.be>). **Ĉefredaktoro estas Paŭl Peeraerts**. Monato ekzistas en papera kaj bita formo. Aperadis en 2025 ankaŭ voĉlegata versio en la formo MP3 en kunlaboro kun Ligo Internacia de Blindaj Esperantistoj. Paŭl Peeraerts komencis en 2020 koncize prezenti ĉiun numeron per filmeto. Ili estas spekteblaj en la jutuba kanalo de Monato <https://monato.be/jutubo>.

En 2025, Usono ŝanĝis la regulojn pri importado de varoj al Usono, kaj forigis la 'de minimis-escepton', tio signifas ke ekde tiam, eĉ la malaltvaloraj sendaĵoj, inter kiuj revuoj, submetiĝas al novaj importadaj reguloj, kiuj ankoraŭ ne estis fiksitaj, do ekde tiam la normalaj poŝtservoj ne plu povis ekspedi pakaĵojn al Usono, nek revuojn.



La membrogazeto de la Flandra Esperanto-Ligo nomiĝas **Horizon-taal**. Ĝi estas precipe en la nederlanda lingvo. Ĝia **ĉefredaktoro estas Piet Glorieux**. La enpaĝigon prizorgas **Joost Vander Bauwhede** <https://esperanto.be/horizontaal>



La estraro de FEL

En marto 2024 okazis Ĝenerala Asembleo de Flandra Esperanto-Ligo. Elektiĝis tie nova estraro:

Estraro ekde 2024-04

Prezidanto: Piet Glorieux

Sekretario: Johan Van Eenoo

Kasisto: Johan Donckerwolcke

Estraranoj: Alex Humet, Ben Indestege

Estraro 2018 - 2024

Prezidanto: Nicky Janssen

Vicprezidanto: Ivo Vercammen †

Sekretario: Piet Glorieux

Kasisto: Kevin De Laet

Estraranoj: Yves Nevelsteen, Johan Van Eenoo

Ĉe FEL laboras ĉi-momente **Lode Van de Velde**. **Gerd Jacques kaj Paul Peeraerts** laboris tie antaŭe kaj ankoraŭ multe helpas. Ilin asistas pluraj volontuloj.

La Retbutiko de FEL estis kreita la 9-an de februaro 1996 kaj sekve estas verŝajne la plej malnova funkcia retbutiko pri Esperantaj libroj kaj diskoj. Ĝia retadreso estas <https://retbutiko.be>. FEL ankaŭ havas grandan fizikan librovendejon de Esperanto-libroj! Ĝia adreso estas Lange Beeldekensstraat 169 en 2060 Antverpeno (Antwerpen).



Lokaj grupoj de FEL

Antverpeno: La Verda Stelo

FEL-administrantoj: **Agnes Geelen** kaj **Klaas Dijkstra**. <https://esperanto.be/antwerpen/> - <https://eventaservo.org/o/LVS>. Preskaŭ ĉiusemajne okazis altnivela programo per Zoom kunlabore kun la londona Esperanto-klubo (<https://londonaesperantoklubo.com/>). Multe kontribuis al la agado en 2025 en Antverpeno **Ella Strug**.

Loveno: Esperanto 3000

FEL-administranto: **Nicky Janssen**.

Ĉefa aktivulo en Loveno estis en 2025

Lode Van de Velde.

<https://www.esperanto3000.be>

https://eventaservo.org/o/EO_3000

Esperantistoj el tuta Belgio plurfoje kunvenis en la oficejo de Konsilo, firmao de **Myriam Vandersteen** kun nomo en Esperanto. Fine de 2025 la domo estas vendita. La loka klubo do devos serĉi novan kunvenejon por kunvenoj ekde 2026.



Gento: La Progreso

FEL-administrantoj: **Katja Lődör** kaj **Hans Delnat**.

<http://esperanto.be/gent>

Kutime oni kunvenas en la Genta klubejo unufoje monate je vendredo. La klubaj vesperoj komenciĝas je la 20a horo. Multe agis en Gento en 2025 **Patrick Haerick**, ĉefe pri la lingvaj kafejoj.

Ankaŭ en Gento ekzistas Esperantodomo. Ĝia adreso estas Peter Benoitlaan 117 en 9050 Gentbrugge.



Limburga Esperanto-Asocio (LEA)

FEL-administranto: **Henri Schutters**. Ĉefaj aktivuloj de LEA estis en 2025 **An Olijslagers** kaj **Emiel Vanderfeesten**.

Retejoj: <https://esperanto.be/limburg> kaj <https://eventaservo.org/o/LEA>

Regulaj kunvenoj de LEA okazis en 2025 en ĉiu lasta ĵaŭdo de la monato, de la 20-a horo ĝis proksimume la 22-a horo, en 't Poorthuis en Peer. Ĉiun merkredon matene (ne dum la lernejoj ferioj), Henri Schutters gvidis Esperantokurson en 't Poorthuis.

Kortrijk: La Konkordo

FEL-administranto: **Lucrèce Decostere**. Ĉefaj aktivuloj de La Konkordo estis en 2025 **Piet Glorieux** kaj **Joost Van Bauwhede**

Retejoj: <https://esperanto.be/kortrijk> kaj https://eventaservo.org/o/La_Konkordo

Bruĝo: Paco kaj Justeco

FEL-administranto kaj ĉefa loka aktivulo estis en 2025 **Johan van Eenoo**. Li regule instruis Esperanton en Bruĝo al 3 personoj. <https://esperanto.be/brugge>

Ostendo: La Konko

FEL-administranto: **Marie Droog** (ekde marto 2025). Ĉefa aktivulo estis en 2025 **Anne Brabant**. <https://esperanto.be/oostende> - https://eventaservo.org/o/La_Konko

Noorderkempen: La Erikejo

FEL-administranto: **Mireille Storms**

Retejoj: <https://laerikejo.wordpress.com> kaj <https://benelukso.eu/la-erikejo>

La Esperanto-grupo La Erikejo estas malgranda grupo, kiu praktikas sian lingvon ĉiumonate. Kutime ili kunvenas en la trinkejo Heide City en Kalmthout (proksime de la stacidomo de Heide). Ĉi tio plejofte okazas en la tria ĵaŭda posttagmezo de la monato.

Bruselo: Esperantista Bruselo Grupo (EBG)

Instruas en Bruselo al komencantoj **Françoise Pellegrin**. Paroligaj kunvenoj gvidas **Nicolas de Buyt**. En 2025 foje prelegis en la klubo ĝia prezidanto **Bernard-Regis Larue**, ekzemple pri Neŭtrala Moresnet. <http://www.esperantobruselo.org/eo/> - <https://eventaservo.org/o/EBG>

EBG aperigis en 2025 kvar ekzemplerojn de la revuo Esperanto Aktuala. Ĝi estas tute en Esperanto. Ĝia ĉefredaktoro estas Françoise Pellegrin. La reta arkivo de la revuo: <https://sites.google.com/site/ebgaktuala>



Ankaŭ la junuloj tre aktivas en Bruselo. EBG estas unu el la baptopatroj de la studenta klubo KLUBO (*Klubo de Liberaj Universitatoj de Bruselo*). Ili ĉefe organizas kanto-vesperojn (studentaj kantoj en Esperanto aŭ aliaj lingvoj).

Ili en 2025 ankaŭ duobligis filmon kaj organizis feston de ekvinokso.



Valona Esperanto-asocio (V.Esp-o)

Valona Esperanto-asocio (V.Esp-o) estas senprofitcela asocio laŭ belga juro kies celo estas propagandi la Internacian Lingvon Esperanto en la franclingva parto de Belgio. Ĝia alvokiĝo estas kunigi ĉiujn simpatiantojn kaj evidente ĉiujn Esperanto-parolantojn en Valonio. <https://esperanto-wallonie.be>

La membrogazeto de Valona Esperanto-asocio nomiĝas '*Espéranto en Marche*'. Ĝia ĉefredaktoro estas **Jean Annet**. La redaktadon kaj enpaĝigon prizorgas Yves Nevelsteen. Aperis en 2025 tri revuoj. La kvara eldono estis la kongreslibro de la Gebeneluksa Kongreso. Ĉiuj eldonoj estas elŝuteblaj de la retejo <https://mallonge.net/EEM-arkivo>.



ESPERANTO EN MARCHÉ

ni faris
JUNIARA E-SEMAJNO
BEST-STUDEMAJNFINO
ni faras
EKSPEDICIO KONTRAŬ MILITO
ni faros
PEKO
GEBENELUKSA KONGRESO



Revue trimestrielle belge
PRINTEMPS 2025 - N°1



ESPERANTO EN MARCHÉ

ni faris
PEKO EN TILFF
AGADO EN KLUBOJ EN VALONIO
ni faras
SOMERA FERIO EN ESPERANTUJO
ni faros
GEBENELUKSA KONGRESO



Revue trimestrielle belge
ETE 2025 - N°2



Gebeneluksa Kongreso

Germana-beneluksa kongreso
2 - 5 oktobro 2025 Schleiden (DE)

Kongreslibro
TEMO: TRANSLIME



ESPERANTO EN MARCHÉ

ni faris
GEBENELUKSA KONGRESO
UK EN BRNO
ni faras
ESPERANTO EN LA RADIO
ni faros
EXCELLANGUES
MUZIKUMADO EN LOVENO-LA-NOVA



Revue trimestrielle belge
AUTOMNE - HIVER 2025 - N°3-4

La estraro de V.Esp-o

Estraro en 2025

Prezidanto: **Jean Annet**

Sekretario: **Valère Doumont**

Kasisto: **Claude Glady**

Lokaj grupoj de V.Esp-o

Esperanto en Charleroi

Ĉefaj aktivuloj: **Hubert Demeyere** kaj **Michèle Villers**. Retejo: <https://esperanto.be/charleroi>

En 2025, esperantistoj kunvenis en Charleroi preskaŭ ĉiusemajne en kultura centro en Mont-sur-Marchienne. La kursoj okazas ĉiun mardon: matene de la 9h ĝis la 12h. Antaŭ la kafaŭzo (10h30) surbaze de teksto, oni tradukas (F - E; E - F) kaj diskutas pri la gramatiko, la plej taŭgaj vortoj kaj poste pri la enhavo. La debatoj estas kelkfoje tre viglaj. La temoj varias laŭ la deziroj de ĉiu : ekz. la sano, la historio, la dombestoj, ktp. De la 10h30 ĝis la 11h: kafaŭzo (kafo, kukoj). Post la paŭzo estas iomete malpli serioza ni organizas ludetojn, rakontas ŝercojn (en Esperanto kompreneble). Nia celo estas paroligi ĉiujn.



Esperanto en Lieĝo

Prezidanto: **Freddy Close**. Kasisto kaj instruisto: **Eric Nemes**. Sekretario: **Pierre-Yves Dekerck**. Instruisto: **Eliane Pironnet**. <https://esperanto.be/liege>. En 2025, la grupo de Lieĝo kunvenis en du malsamaj lokoj, unufoje monate: en Méry marde posttagmeze, kaj en Lieĝo (ĉe Toutes Directions) sabate matene. Ili daŭrigis la kurson en Huy kaj komencos novan en Seraing!



Esperanto en Louvain-la-Neuve

En Louvain-la-Neuve **Catherine Royaux** neregule organizas kunvenojn. Ĉar ŝi loĝas en universitata urbo, ofte la kunvenoj estas tre internaciaj.

Asocioj aktivaj en Belgio

Movado sen Nomo

Ĉefaj aktivuloj en 2025: **Ludovic Jongelinghs**, **Mireille Storms**, **Nicky Janssen** kaj **Lode Van de Velde**. <https://esperanto.be/msn>

La 25-an de januaro 2025 estis 45 jaroj post kiam patro Phil Bosmans helpis fondi la movadon Movado sen Nomo (MsN), la Esperantan version de sia ĉefa projekto **Bond Zonder Naam**. Okaze de la 45-jariĝo de Movado sen Nomo, okazis manĝofesto (<https://mallonge.net/msn-festo>) en Antverpeno kaj eldoniĝis kalendaro. Pri la historio de Movado sen Nomo via povas legi en Vikipedio: <https://mallonge.net/msn-viki>.



Haveblas la kalendaro de Movado sen Nomo ankaŭ por la jaro 2026!
<http://retbutiko.be/ero/k2026>



Verdaj Skoltoj: niaj junuloj



Ekde novembro 2012 la Verdaj Skoltoj skoltigas esperantistojn. Valère Doumont sukcese kreis Esperanto-agadon por junuloj en nia regiono. Aktuale **tre internacia teamo de junaj skoltestroj** gvidas infanojn kaj adoleskulojn laŭ skolta metodo dum niaj eventoj. Vidu <https://verdajskoltoj.net> kaj <https://benelukso.eu/verdaj-skoltoj>

La agadoj de la Verdaj Skoltoj multe evoluis dum la lasta jaro:

- eko de grupo de Roveroj (16 jaraĝuloj kaj pli) kiu provas subteni la Esperanto-movadon. Ekzemple per organizado de VSKK (por kuraĝigi NEJ-n daŭre organizi tiun kunvenon), kaj ĉefe organizado de JES en Belgio.
- pli internacia partoprenantaro, kiu ebligas peti monsubtenon de Erasmus+ aŭ aliaj instancoj. Sed malfaciligas organizadon de semajnfinoj.
- pli da lupidoj, kaj komencantoj. Kun pli forta bezono strukture instrui Esperanton

La sekvonta tendumado okazos en Ĉeĥio kunlabore kun organizantoj de la Renkontiĝo de Esperanto-Familioj (REF).

La Verdaj Skoltoj malregule eldonas revueton, **Renato-monato**. En decembro 2025 aperis ĝia 9-a eldono! Jen ligilo al la reta arkivo: <https://mallonge.net/renato24>

BEJ / FLEJA

De 1979 ĝis 2012 ekzistis **Flandra Esperantista Junulara Asocio** (FLEJA). Vi povas legi pri ĝi en Vikipedio: <https://mallonge.net/fleja>. Estas provoj re-fondi FLEJA-n aŭ re-krei novan asocion **Belga Esperanto-Junularo** (BEJ). Pri tio interalie okupiĝas ekde 2023 **Pjotr De Mulder** kaj aliaj aktivuloj de la Verdaj Skoltoj. BEJ ne estas tradicia grupo kun fiksa kunveno, nek propra programo. Ĝia celo estas kune vojaĝi kaj ĉeesti eventojn, kunvenojn kaj kursojn kiuj estas interesaj por junuloj. Vidu <https://eventaservo.org/o/BEJ>.

Eldonejo Libera

Eldonejo Libera estas malgrandkvanta eldonejo fondita de **Lode Van de Velde** en 2016. La celo estas disponigi al ĉiuj verkemaj esperantistoj eblecon eldoni librojn sen eldonaj komisionoj de ekzistantaj asocioj kaj sen investo pro altaj minimumaj eldonkvantoj. La eldonejo eldonas ĉefe librojn en Esperanto (originalajn kaj tradukitajn) kaj multlingvajn librojn. Vidu https://eo.wikipedia.org/wiki/Eldonejo_Libera

En 2025, Flandra Esperanto-Ligo (FEL) transprenis la katalogon de Eldonejo Libera, ekde kiam ties fondinto oficiale eklaboris por FEL. Tamen, la 'marko' "Eldonejo Libera" restos aktiva. Por rigardi la katalogon de Eldonejo Libera, sekvu jenan ligilon:

<https://retbutiko.be/eo/titolo/vorto/Libera>

BAFE - fervojistoj



Retejo: <https://eventaservo.org/o/BAFE>. Ĉefa aktivulo en 2025: **Marc Cuffez**.

BAFE (Belga Amikaro de Fervojistaj Esperantistoj) estas la posteulo de BEFA (Belga Esperantista Fervojista Asocio). BEFA mortis kaj naskiĝis nova organizo, por ke amikoj de fervojoj en Belgio povu membriĝi al la internacia organizo IFEF (**Internacia Fervojista Esperanto-Federacio**). En la printempo de 2020 BAFE estis akceptita de IFEF kiel la landa asocio de Belgio. En 2025 BAFE ne havis agadon krom perado de membreco de BAFE/IFEF, kiu inkluzivas abonon al la revuo **Internacia Fervojisto** <https://mallonge.net/fervojisto>. La revuo aperas 6-foje jare

Ekde januaro 2025 Marc Cuffez estas la nova kasisto de BAFE kaj do ankaŭ kun nova kontonumero: BE12 9735 1602 6492. La konto estas sur la nomo BAFE - Marc Cuffez.

BEMI - biciklistoj



BEMI estas la Biciklista Esperantista Movado Internacia: grupo de esperantistoj, kiuj biciklas iomete pli ofte kaj serioze ol la averaĝa internaciulo. BEMI celas aranĝi almenaŭ unu internacian biciklo-karavanon ĉiujare, sed ankaŭ servas kiel kontaktilo por tiuj biciklistaj esperantistoj, kiuj preferas solaj vojaĝi. Unu el la ĉefaj aktivuloj de BEMI en Belgio estis en 2025 **Eddy Van den Bosch**. <https://bemi.tejo.org>

ILEI - instruistoj



La Internacia Ligo de Esperantistaj Instruistoj estas faka asocio de esperantistaj instruistoj kaj instruantoj de Esperanto. Retejo: <https://ilei.info>

Belgaj komitatanoj de ILEI en 2025 estis **Marc Cuffez** kaj **Kristin Tytgat**. Marc ekis kiel Sekciestro de la Belga Sekcio de ILEI en 2012, sed anoncis dum la ĝenerala asembleo de BEF, ke li ĉesos je la fino de la jaro 2025. Marc ankaŭ estis eldonisto de la revuo de ILEI (IPR), kiu estis sendita el Belgio. Nova respondeca eldonanto estos Peter Muranyi el Kőszeg, Hungario. La nova sekciestro ekde 2026 estos **André Staes**

IESPA - arkivo

Ĉefaj aktivuloj en 2025: **Marc Vanden Bempt** kaj **Roland Rotsaert**.



Internacia Esperanto-Arkivo <http://www.iespa.eu/>, mallonge IEspA, celas kolekti, arkivi, protekti, administri kaj fari alireblaj librojn, revuojn kaj aliajn dokumentojn kaj objektojn en kaj pri Esperanto kaj planitaj lingvoj, maksimume en ilia originala formo (apud diĝitaj kopioj). Tiu ĉi arkivo celas konservadon kiel heredaĵo, por nelimigita tempodaŭro.

Por realigi ĉi tiun celon, la asocio altiras arkivajn dokumentojn diversmaniere. Ĝi provizas medion (posedaĵon aŭ luadon) taŭgan por gardado en optimumaj kondiĉoj koncerne klimaton, sekurecon kaj simile. Detala inventaro de la arkivaj dokumentoj estas daŭre ĝisdatigata. Principe ne disponeblas pruntado, la aliro eblas surloke aŭ per aliaj vojoj, ekzemple skano.

Internacia Esperanto-Arkivo en 2024 sukcesis akiri domon en Diest. Pluraj belgaj asocioj kaj individuoj subtenis IEspA-n finance (per donacoj kaj monpruntoj) kaj per volontulado.

Fine de 2024, ankaŭ BEF iĝis mecenato per donaco de 1000 eŭroj. Vidu <https://mallonge.net/iespa-subteno>. Ĉe la enirejo pendas jena dankoŝildo por la mecenatoj.

IEspA akiris ĉi ejon dank'al la grava subteno de
siaj mecenatoj (alfabete):

Michel Basso, Belga Esperanto-Federacio, Bert Boon,
Herman Deceuninck, Hans Delnat, Bart Demeyere,
Esperanto 3000 vzw, Jo Haazen, La Hirundo,
Gerd Jacques, Katja Lödör, Roland Rotsaert,
André Ruyschaert, Mireille Storms, TAKE,
Marc Vanden Bempt, Marie-Louise Vanherk

(stato 1/1/2025)

La lovena grupo Esperanto 3000 organizis viziton al la arkivejo en Diest en septembro 2025. Ni surloke konstatis grandan progreson. La arkivo nun plene funkcias. Ĉiuj arkivaĵoj (kiuj antaŭe grandparte troviĝis en la privata domo de Marc Vanden Bempt) estas surlokaj, orde aranĝitaj kaj sekuraj kontraŭ polvo, humido kaj temperaturvariado. La volontuloj havas ekipitajn laborlokojn kaj aldone funkcias prelegejo kaj kunvenejo:
<https://mallonge.net/iespa-fotoj>.

Volontuloj instalas ne nur la ejon, ankaŭ la arkivo mem evoluas. Pluraj personaj kaj asociaj arkivoj alvenis, kaj la katalogoj kreskas. Ĉiu bonvenas ĉe IEspA post antaŭa interkonsento pri la tago. Adreso: Hasseltsestraat 26, 3290 Diest.



Jarraporto 2025

Marc Vanden Bempt sendis jenan koncizan jarraporton pri IEspA en 2025:

En la arkiveja konstruaĵo en Diest, aĉetita en aŭgusto 2024, ni instalas ĉion ĝis plena funkciado. Ĉiuj libroj, revuoj, dokumentoj kaj objektoj ĝis aŭgusto 2024 estis transportitaj al Diest. Tie nun troviĝas ordigita laborĉambro kun loko por kvar kunlaborantoj, ordigejo kaj skanejo. Apude estas ekipita salono por kunvenoj, kursoj kaj prelegoj. Tie okazos ankaŭ laŭtempaj ekspozicioj, apud fiksa ekspozicieto pri Esperanto.

Samtempe, en 2025, ni plu katalogis atendajn dokumentojn, librojn, revuojn kaj objektojn, kaj akiris multajn novajn kolektojn. Fine de 2025 la kolekto konsistis el 8433 plenaj revujaroj de 1011 revuotitoloj, 16 402 libroj kaj broŝuroj, kelkdek bretmetroj da dokumentoj – el kiuj jam 7016 eroj en 325 dosieroj estis katalogitaj – kaj multaj objektoj, el kiuj jam 2704 eroj estis katalogitaj.

En 2025 ni ricevis plurajn gravajn kolektojn, interalie (nekompleta listo) tiujn de Petro De Smedt (lasta kompletigo), Agnes Geelen, Eddy Raats (libroj eldonitaj de MAS), Torben Kehlet, Chris Declerck, Jean-Claude Thumerelle, Limburga Esperanto-Asocio (LEA), Louis Beaucaire kaj Hans kaj Marjet Erasmus. UEA subvenciis nin per la Bachrich-fondaĵo. Duoblaĵoj de IEspA estas vendataj kaj interŝanĝataj.

Ni disponigis la kolekton por studoj pri planlingvoprojektoj, por la Numismatika Asocio ENA, pri Moresnet, pri diversaj individuaj esperantistoj, kaj por diversaj informpetantoj. Dum la jaro ni dissendis tri novaĵleterojn al ĉirkaŭ 80 retadreso. Aperis ankaŭ kelkaj artikoletoj, interalie en Horizon-taal kaj Archiefpunt.

Kelkaj grupoj kaj individuaj personoj vizitis la ejon en Diest. Tio konkretigis por ili la bildon pri IEspA. Estis malfermaj tagoj en aprilo (printempa semajnfino kaj heredaĵotago), en septembro (Esperanto 3000) kaj en novembro (por enloĝantoj de Diest).

Aldone, kelkaj lokaj asocioj ekluas la prelegejon kaj tiel ankaŭ konatiĝas kun Esperanto kaj konkrete kun la arkivo. Mono, kaj precipe volontuloj, restas gravaj atentopunktoj. Junuloj estas aktive serĉataj por ekagadi kaj poste eventuale transpreni la gvidadon de IEspA vzw. En 2025 kaj 2026 ni akiris impostsubtrahan eblecon por donacantoj. Restas repagenda granda prunto.

Eblas viziti la ejon post antaŭa interkonsento per info@iespa.eu aŭ dum anoncataj malfermaj tagoj. La administrantaro daŭre konsistas el Bert Boon (Munkzwalm), Roland Rotsaert (Diest) kaj Marc Vanden Bempt (Winksele). Volontule kunlaboras Marie-Louise Vanherk kaj Agnes Geelen.

Projektoj de IEspA

Internacia Esperanto-Arkivo (IEspA) realigas sian projekton "transformado de magazeno al arkivejo". Ekde decembro 2025 La Koning Boudewijnfondaĵo kunlaboras en la projekto. La privataj donacoj ekde jare po € 40 al la Fondaĵo rajtigas je impostsubtraho de la reale donacita sumo (art. 145/33 WIB). Tre bela atingo!

<https://www.iespa.eu/index.php?ln=eo&pg=subteno#projekto>

Publike alirebla Esperanto-dokumentaro en Antverpeno

Du Antverpenaj urbaj institucioj konservas Esperanto-dokumentaron. La Heredaĵbiblioteko Hendrik Conscience (mallongigita EHC, publikigaĵoj) kaj la FelixArchief (arĥivaĵoj) tion faras jam ekde 1907 kaj 1928 respektive. Surbaze de kunlaborinterkonsento inter FEL kaj EHC, aprobita de la Antverpena Urba Konsilantaro, la 30-an de majo 2016, la ekzistinta malgranda bibliotek-kolekto de proksimume 800 eroj kreskis al preskaŭ 9 000, danke al du gravaj donacoj de FEL, en 2016 kaj 2020. Pli etaj aldonoj ankoraŭ regule okazas, kiel ekzemple en 2025 tiuj el la heredaĵo de la forpasinta Nederlanda esperantisto Simon Smits.

La konservado de la kolektoj estas laŭleĝe garantiita. Alirebleco estas faciligata per profesie prizorgataj ciferecaj katalogoj. Ĉiuj dokumentoj estas konsulteblaj preskaŭ ĉiutage en la legejoj de ambaŭ institucioj, laŭpete per komputilo. Eta parto de la dokumentaro estas senpere konsultebla interrete. Por pliaj informoj, bonvolu kontakti **Cyreen Knockaert**, volontulan katalogiston en EHC (koordinatoj obteneblaj ĉe FEL aŭ IEspA vzw). Ekde 2016, en Horizon-taal regule rilataj artikoloj estas publikigitaj.

<https://anet.be/record/opaccoloiehc/co:ehc:108>

<https://anet.be/desktop/ehc>

<https://felixarchief.antwerpen.be/archievenoverzicht/627333>

<https://felixarchief.antwerpen.be/>



Esperanto-Numismatika Asocio (ENA)

Pro la ĝis tiam kompleta manko de tia projekto, en 2013 la belgo Bert Boon fondis la verŝajne ununura fakgrupo "Esperanto-Numismatika Asocio" (ENA) kun revuo "Esperanta Numismatiko" en la historio de Esperanto.

La instiga kialo estis la konstato, ke en Esperantujo la propra trezoro je moneroj kaj medaloj estas apenaŭ konata, eĉ ne en la vasta rondo de kolektantoj. Kaj tiuj, kiuj scias, ke vere ekzistas tiaj belaĵoj, supozas, ke ili estas kvante kaj kvalite tute malgravaj. Tial, unu el la ĉefaj celoj de la nova fakgrupo estas montri al la esperantistoj kaj al la cetera mondo, ke esperantaj numismatikaĵoj estas kolektindaj kaj nepre pristudendaj artefaktoj. Kroma celo estas kiel eble plej baldaŭ kompili kaj eldoni katalogon kaj enciklopedian terminaron.

Ekde 2014 ĉiujare aperis 4 eldonoj de la revuo Esperanta Numismatiko. Aliĝo al la asocio estas senpaga. Se vi deziras pliajn informojn, ne hezitu kontakti Bert Boon per retpoŝto: bert.boon@skynet.be

Jen ekzemplo el la revuo, 2025/3 paĝo 8:

Tipo C6 - Ordenaspektaj medaloj

53a Universala Kongreso de Esperanto 1968



Lando: Hispanio
Metalo: aluminio
Diametro: 30 mm
Jaro: 1968

Kvanto: *serĉata*
Pezo: 8,82 g
Medalisto: *serĉata*
Diko: 1 mm

Reta arkivo de ENA: <https://mallonge.net/ena>

TEVA - vegetaranoj



Tutmonda Esperantista Vegetarana Asocio (TEVA) estas asocio de esperantistaj vegetaranoj. Ĝi fondiĝis en 1908 kaj estas la plej malnova el la nuntempe ekzistantaj internaciaj organizoj de vegetaranoj. Vidu <https://eo.wikipedia.org/wiki/TEVA>


La ĉefa aktivulo de TEVA estas la belgino **Heidi Goes**. **Lode Van de Velde** transprenis en 2025 de Yves Nivelsteen la enpaĝigon de la revuo Esperantista Vegetarano, kiu aperis nur unufoje (kutime dufoje). Eblas aboni la revuon papere kaj elektronike. Pro tempomanko, la retejo <https://vegetarismo.info> kaj la reta arkivo <https://vegetarismo.info/arkivo-ev/> delonge ne estas aktualigitaj.



TEVA-KUNVENO EN
BROCELJANDO

VEGANAJ
RECEPTOJ

HISTORIO
DE LA SPICOJ



La avangardo de
saĝeco – parto II

Rekreskigi legomojn
kaj herbojn hejme

Mangado dum UK:
vegana sperto

Konkludo

Esperantistoj en nia regiono surprize multe agis en 2025! Unu el la ĉefaj 'problemoj' de la nuntempa Esperantujo laŭ mi estas, ke esperantistoj mem subtaksas kiom multe efektive okazas, kaj ke oni ne sufiĉe komunikas nek fieras pri la atingoj. Pro tio vere indas verki detalan jarraporton, kiu registras ĉiujn gravajn aspektojn de nia nuna agado.

Per 51-paĝa raporto (!) eblas 'pruvi', ke Esperantujo en nia regiono plu vivas kaj viglas. Mi esperas, ke ĝi instigos vin agi por kaj per Esperanto, kaj ke vi **kunlaboros** ankaŭ dum venontaj jaroj, en via loka klubo, kun najbaraj asocioj, kaj internacie.



Beneluxsa Kongreso 24-28 septembro 2026

<https://benelukso.eu/kongreso>



Ĉu vi jam konas kaj uzas la Internacian Kalendaron de Eventa Servo? Temas pri daŭre aktualigata listo de la ĉefaj Esperanto-eventoj tutmonde. <https://eventaservo.org/ik>